

REGIONAL NEWS BULLETIN

(MIDDAY)

Tuesday, September 23, 2025

Time - 2:30pm - 2:35pm



CM

Chief Minister Pu Lalduhoma kaihhruaiin vawiin khan CM Conference Hall ah Mizorama NHIDCL ten kawngpui an sial mek chungchang sawiho a ni.

Chief Minister chuan, National Highway thawmthat ngai a tam leh tawh tih sawiin Lirthei tana tlan harsa khawpa chhia a tam leh tawh hle a ti a, Contractor Liability Period chhunga mi vek an la nih angin rang taka thawmthat thuai a duh thu NHIDCL hotute a hrilh a, Bypass Road kawng thar an laih hnua khaw chung kawngpui, state PWD hnena an la hlan loh te a rang lama hlan tur te, Aizawl to Vairengte kawngpui chu ngaihpaawimawh bik a nei turin a chah a. Central sorkara Rigid Pavement hmanga kawngpui sial tawh zawk tura a rawtna zirchiang tura hmalakna kalpui rang turin a chah bawk.

NHIDCL lam hian an hnathawhna hmun hrang hranga harsatna an tawhte Chief Minister hnenah hian an thlen a. State P&E Department nena hmalakho an mamawhna hmun te, ram neitu chiang lo chin fel la ngai te, Aizawl Eastern Side Bypass Road laih tura harsatna an tawh mek te, zangnadawmna lama harsatna an tawh hrang hrang te, mi thenkhatten kutthlak an phal loh vanga hna an thawh theih lohna hmun te leh chak zawka hna an thawh theih nana an mamawh dangte an tarlang a ni.



YLA DAY

Wawiin hi Lawngtlai District a Tlawmngai pawl lian ber Young Lai Association Day wawi 51-na a ni a, hlawk leh tangkai takin YLA Day hi hman a ni.

Central YLA President Pu F Lalrothanga chuan hmun hrang hranga YLA Member te chibai bukin duhsakna a hlan a, YLA chu mangang leh chhumchhia, rethei leh changhai ten an belh ngam a ni tih sawiin, ram leh hnam that nan theihtawp an chhuah reng a ni a ti a, ruihhlo do kawngah pawh tha tlah lovin, YLA Kumpuan, Ruihhlo Do tih chu chaktakin bawhzui a ni a ti bawk.

YLA Day hi Branch hrang hrangte chuan tha an tih angin an hmanga, vantlang tana thiltha tih nan te hmangin, an huamchhunga thenfai ngailai tifaiin an thawk chhuak a, Infiamna leh infuihthar nan te, intihhlim nan ten an hmang a ni.

Tun dinhmunah YLA Sub-Hqrs 10 Branch 121 awmin Member sing 3 vel an awm mek a ni.

(Lalngheta Ralte PTC Lawngtlai)



BJP PRESS CONFERENCE

BJP MLA Pu K Hrahmo-a'n sawrkar laipuiin GST a siamthat avanga thil man tlawm tawh tur leh Railway Service avanga bungraw phurh man a let a a tlakhniam dawn avangin Mizoramin "Malsawmna Thuah hnih" a dawng a ti.

He thu hi vawiina Aizawl Press Club-a GST chungchanga thuthar thehdarhtute a kawmnaah sawiin, Pu K Hrahmo chuan Prime Minister Pu Narendra Modi-a’n kumin Independence Day-a mipui nawlpui nitin mamawh lei leh hralhnaah harsatna an tawh thin tizangkhai tura hmalakna pawimawh tak GST next generation reform kalpui a nih tur thu a lo puan tawh bawhzuiin nimin September ni 22 atang khan ram pumah a taka hman tan a ni chu lawmawm a tih thu a sawi a, GST rate tihhniamin a tum lian ber chu mipui nawlpui ban phak leh man man zawka lei theih tura thil man siamthat a ni a, sumdawngten a man an tihniam ngei tur a ni tih sawiin, nimin atangin GST rate tihhniamna bungrua leh thil zuarte zingah a man tihniam lo report lut a awm chuan dan angin action lak theih a ni tawh a ti a. GST rate tihhniam hmaa bungraw lak tawh te pawh rate thar anga kalpui tawh tur a ni a, mipui nawlpuite chuan an dikna chanvo an hriat a tul hle tih a sawi a ni.

Pu K Hrahmo chuan GST 2.0 atanga mipuiten hlawkna an dawn zingah nitin mamawh ah nasa takin chhiah (GST) a tlahniam a, Cancer tiamin natna khirh tak tak enkawlna damdawi thenkhatah tax pek a ngai tawh dawn lova. Hei hian mi rethei leh harsa zawkte a pui nasa dawn hle a ti a, Tractor leh leilehna hmanraw hrang hrang man nasa taka tlahniam chuan loneitute phurrit tam tak a chhawk theih bakah loneitute a tiphur ang a, thlai tharchhuah pawh a pun ngei a rin thu sawiin, Tax tlahniam chuan sumdawngte leh eichawpzuarte chu nasa takin an sumdawnna a ti thang thei dawn niin a sawi a, central sorkar zarah Mizoram chuan hriatreng tawh tur "Malsawmna Thuah hnih" a dawng a, chungte chu GST siamthat avanga thil man tlawm tawh tur leh Railway Service, abik takin Cargo service avangin bungraw phurh man a let a tlahniam tur te a ni a ti bawk.



PHE MINISTER

PHE Minister Prof. Lalnilawma’n Union Minister, Ministry of Housing and Urban Affairs (MoHUA) Pu Manohar Lal Khattar chu a chenna inah kawmin, Mizoram khawpui hrang hrangah te tui in tur hnianghnar zawk a awm theih na tur project a sawipui.

PHE Minister Prof.Lalnilawma hian Aizawl leh District Headquarters hrang hrang te tana tui in tur hnianghnar zawk a awm theih na tur project sawipuiin, tui in tur hnianghnar zawk Mizoram khawpui hrang hrang a neihna tur project chu Mizoram sorkar leh Chief Minister Pu.Lalduhoma’n mimal taka an ngaihpawimawh thu a hrih a. Union Minister chuan heng project te tih theih dan kawng dapa la sawi ho zel ni se tiin a lo chhang a ni.



SEVA PARV

Mipui rawngbawl leh sorkar inrelbawlna tha tih thupui a hmangin Prime Minister Narendra Modi sorkarna hnuaiah kum kalta chhung khan hmasawнна kawng hrang hrangin kalpui a ni a.

Tun tum Seva Parv hunah chuan kum 11 chhungin Prime Minister Narendra Modi sorkarna hnuaia hmalakna te han tarlang ila..

Prime Minister chuan ram chhunga thalai te an intodelh theih nan kawng hrang hrangin hma a la a. Pradhan Mantri Kaushal Vikas Yojana scheme kaltlangin thalai vbch 1 leh nuai 63 ten kutkawih eizawнна an neih theih nan training hrang hrangte he scheme hnuaiah hian neiin, sumdawnna bul tan turin a pui a ni.

